

2014ko MARTXOAREN 12an UDALBATZARRAK EGINDAKO APARTEKO OSOKO BILKURAREN AKTA **4 zk.**

Zarauzko udaletxeko batzar-aretoan, 2014ko martxoaren 12an, iluntzeko zazpitan, Udalbatzarra bildu da, egun eta ordu horietarako aurretik deituta zegoen aparteko bilkura egiteko xedez.

Honako zinegotzi hauek bertaratu dira:

Batzarburua	Juan Luis Illarramendi Roteta jn.
Bertaratutako zinegotziak	Eider Illarramendi Azkue and. Jabier Etxaburu Elu jn. Karmele Alberdi Linazasoro and. Iñaki Eizagirre Eizagirre jn. Alizia Osa Otxandorena and. Mikel Goenaga Gubia jn. Ane Eizmendi Alberdi and. Gari Berasaluze Ostolaza jn. Imanol Lasa Zeberio jn. Maite Garrastazu Aranguren and. Ixidor Larrañaga Aierbe jn. Jesus Arana Gomez jn. Patxi Elola Azpeitia jn. Irma Domingorena Zampirain and. Gloria Vazquez Herranz and. Mariana Aranburu Garate and. Aser Lertxundi Manterola jn. M ^a Jose Lafuente Grasa and.
Ez dira etorri	Maribel Albizu Barrenetxea and. Iban San Martin Hernandez jn.
Idazkaria	Ines Diaz de Villafranca Arzamendi and.

Batzarburu jaunak hala adierazita, hasiera eman zaio bilkurari. Idazkariak adierazi du bilkura apartekoa dela; eta horren arrazoia da bandera jartzeko epea martxoaren 16an bukatuko dela.

Ondoren, eguneko aztergai bakarra aztertu eta eztabaidatzeari ekin dio Udalbatzarrak. Bilkura honela izan da:

GAI-ZERRENDA

Bakarra.- BANDERA ETA MEZUA

BILDU eta EAJ-PNV udal taldeek aurkeztutako proposamena irakurri du idazkariak. Honela dio:

“BANDERA ETA MEZUA

1936ko irailaren 20a. Frankistak iluntzean iritsi dira herrira. Matxinatuek parrokiara jo dute aurrea, otoitz egitera. Jarraian, udaletxe hondatura. Areto nagusira sartu eta, beste ezer baino lehen, bandera gorri-horia jarri dute, “Viva España!” eta “Vivan los requetés y falangistas!” eginez. Ez dago botoen beharrik. Komandante militarrek izendatu du udalbatza berria biharamunean. “Viva el Ejército Salvador de España”, dio irailaren 21eko pleno bereziaren aktaren azken lerroak.

1977ko urtarrilaren 20a. Erreketeek eta falangistek ekarritako banderaren pean egin ditu berrogei urte Zarauzko udalak, baina iritsi da eguna. Bergarako alkateen mugimendua gidari, ikurriña katakunbetatik plazara atera da. Gobernadore frankistak izendatutako alkateak nahiago izan du dimititu, ikurrina jaso baino. Ikastolen guraso elkartetik barrena udalbatzan sartutako zinegotziak, orain jarduneko alkate, jaso du bi kolpetan ikurrina, foru zaharren enparantza herritarrez lepo dagoela. Aldamenean, bandera gorri-horia jarri behar izan dute. Legea lege.

1979ko ekainaren 25a. Gauerdia da. Herritarren botoen bidez aukeratutako alkatea ikurrina jasotzen ari da udaletxearen balkoian, plazan kabitu ezinik bildu diren zarauztarrak “Pelaio Pelaio” abesten ari diren bitartean. Erdiko mastan ikurrina, alde batean Zarauzko oihal gorria, eta bestean Gipuzkoako zuria. Hamarkada luzeetan aurreneko aldiz, bandera hori-gorriarik ez da ageri balkoian. Herritarren borondatea lege, behingoz.

2013ko abenduaren 20a. “Viva la Constitución” oihukatzea ofizio duen delegatuaren salaketari arrazoi eman diote epaitegiek. Honenbestez, gure udalari agindu diote bandera arrotza jarri behar duela, bai kanpoan bai barruan, lehenetsuneko lekuan, beste banderak baino gehiago dela nabarmentzeko moduan. “Porque simboliza la nación, es digno de soberanía, independencia, unidad e integridad de la patria y representa los valores superiores expresados en la Constitución.” Ez urtean behin, ez bitan, 365 alditan baizik. Asteaz zazpi egun, egunean 24 ordu. Legeak ez du oporrik.

2014ko martxoaren 12an. Gaur. Lege arrotzek aginduta bandera arrotza jartzera doa herritarrek aukeratutako udala. Legea lege, berriro. Herritarren ordezkarien gainetik, beste behin. Horixe erakutsiko digu oihal gorri-horiak egunean 24 orduz, urtean 365 egunez: gure borondatearen gainetik ezarri nahi dizkigutela, eta ezarri egiten dizkigutela, “los valores superiores expresados en la Constitución.”

Testu honek dioena gure hartuz, honakoa eskatzen diogu Zarauzko Udalari:

1. Herritar asko eta askorentzat gaurko eguna laidoaren eguna da. Bandera inposatuko zaigu, baina horregatik ez da gurea izango.
2. Dokumentu honen bidez, eskaria luzatzen diogu Zarauzko Udalari, lehengo egoerara itzultzeko beharrezko betekizunak has ditzan, herritarren gehiengoaren borondateari jarraiki, hark emana baita udalbatzar honek duen boterea.
3. Dei egiten diogu Espainiar Gobernuari sinbolo eta legeen inposaketa politika alde batera utzi eta herri honek bere etorkizuna libreki erabakitzeko duen eskubidea errespetatzea dezan."

Udalbatzarrak, gehiengoz, transkribatutako proposamena onartzea ERABAKI DU.

Eta aztertzeke besterik ezean, batzarburu andreak hala aginduta, bilkurari amaiera eman diote, iluntzeko zortziak laurden gutxitan, eta nik, idazkariak, horren guztiaren fede ematen dut.